

河
防
疏
略

河防疏畧卷之三

義烏朱之錫梅麓甫著

濟南李之芳鄴園甫定

稽山後學徐沁埜公輯

兩河利害甚鉅疏

題爲兩河利害甚鉅脩防物力維艱謹就見行事例
酌議增損以襄重計以裨實政事竊照黃河建瓴
萬里及入河南以下土壤既鬆群流奔匯泛溢之
害無代無之元以前河猶從北入海其間議塞議
防官窮於智計民困於徵徭者載在史冊難以縷

數迨至前明用河資運夫有歲編銀有額設戒愆之法非不周也乃二百餘年之間被大害興大役者猶至五十餘見當時所稱治水能臣如徐有貞塞張秋役夫五萬八千劉大夏塞荊隆口用軍民夫十二萬餘潘季馴先後行河役夫俱至八九萬甚至曾如春曹時聘蒙牆之役連年役夫俱以三十萬計所請帑金亦復不資河之悍激湍流未易以人力勝蓋其性然也我

朝因明之舊數百萬

京儲仰給東南黃河自榮澤以至山陽南北兩岸垂
四千里苟蟻穴不戒漕且中斷則凡所以籌河者
豈能與前明有異臣自蒙

恩受事稽之故籍問之水濱前明經營遺蹟數十年來
廢弛已甚如太行遙堤政宋任伯雨所謂寬立隄
防約攔水勢者治河要策無以出此而竟以工鉅
帑詘議寢至于運河自通惠至董口清口至江共
計二千餘里防淤防淺舊時規制僅存十五以臣
職掌論之何事不宜修復然今者司農告匱民力

涸敝無論舉羸未易卽斤斤歲修常例河帑缺額
漸苦捉襟臣早夜焦思實有不能一刻卽寧者爲
今之計亦惟是內酌盈虛外權緩急隨時補苴期
不失爲治標之策而已除應有急修工程俟司道
勘報容臣酌議具

題外今據見行事例有宜稍加損益以裨河政萬分
一者共得十事一曰陳明河南夫役一曰酌議准
工夫役一曰查議通惠河工一曰特議建設柳圍
一曰嚴剔河工弊端一曰釐撥贖盡銀兩一曰慎

重河工職守一曰申明河官專責一曰申明激勸
大典一曰酌議撥補夫食各爲一疏仰請

睿鑒如果臣言可採伏乞

勅部議覆行臣遵奉施行至各疏內事關係議不無字
多逾格統祈

鑒宥

順治十六年正月初八日題二月初六日奉

旨工部知道

陳明河南夫役疏

題爲陳明河南夫役事竊照黃河經由河南地界南岸自滎澤縣堤界起至虞城縣界止計六百四十里北岸自武涉縣堤界起至考城縣界止計三百四十餘里山東之境僅北岸歷曹單二縣計二百里每歲修守固有成例但查曹單額設夫數除裁減抽兵外尚有徭夫一千三百零八名看堤管夫一百八十六名河南開歸等府止見在堡夫八千餘名臣檄查該省河屬舊籍皆已散失無攷借補

得前河臣翁大立疏艸內開河南黃河夫役每年
五百里內七十三州縣編做工河夫一萬五千七
百六十二名半每名做工三個月工食銀三兩共
計工食銀四萬七千二百八十七兩五錢五百里
外三十五州縣編徵銀河夫一萬一千六十一名
每名徵銀三兩共計銀三萬三千一百八十三兩
聽候辦料及僱夫支用若臨河二十六州縣又於
均徭內編倉堡夫一千一百五十七名看守堤壩
磨房等役每名工食銀一十二兩共計銀一萬三

千八十四兩又檢得前河臣潘季馴河防書內開
河南山東自遙堤成後無復衝決者夫力多也今
徐北至單縣界見脩堤壩長一百五十餘里而夫
役止七百餘名是每里僅四五名耳其何能濟夫
以百餘里之堤猶以七百名爲少河南兩堤所云
夫多者又可類推矣隆萬年間該省歲修夫數大
概如此不知何時更變五百里內亦止一例徵銀
計通省歲額共八萬八千餘兩

本朝來除荒缺額不及三萬此外止察出新增銀一

千有奇河工歲修仍沿明季之制每年估計準工
鳩夫計夫給食堤工以土方論埽工以日期論在
官曰募其實在民不得不計畝而派總以河夫之
役倍苦日給之食本廉若憑空號召縱懸金市門
誰則肯應若欲槩從民間平價則河帑雖裕勢亦
不敷據萬曆時黃河全書內河臣劉士忠有云貧
者不肯應募富者論地派夫卽翁大立疏內旣稱
河夫每名工食銀三兩而亦不免曰編者是募夫
之法又必兼派而行不特今時爲然也若以黃河

已決爲有事歲修爲安瀾衡量夫數則前河臣曾
如春曹時聘蒙牆之役兩請帑金至二百萬用夫
三十萬者一決口也去歲雷家集柴溝姚家蕩用
夫不過數百名者亦一決口也由前言之則積數
十年歲修而有餘由後言之則第較歲修一工且
不足是又未可執一而論卽所云安瀾之義正以
爲河本湍激未至橫流謂之曰安然其湍激之性
固無分於已決未決也伏秋水漲數里之岸呼嘆
而至一當掃灣迎溜之所非埽護之縱有重障如

穿縞葭其防之也一里之堤非三萬餘工不成高一丈長十丈之埽非千人數百人不任推挽今歲之堤歷再歲而風雨之所淋卸車道壅穴之所毀蝕高者已卑厚者已薄加以濁流無定條南條北縷堤不支棄而守月月堤之內不得不又議土工是故

朝廷設官無不以愛民節財爲職獨治河一事以勞民者保民費財者經

歲修之制載在

勅書豈不欲與民休息哉河之所在勢固無如何耳見
在河南夫數屢經諸臣條陳未免以夫多爲疑臣
惟該省瘡痍雖經新復洪流寧異昔時今雖不必
遠照隆萬舊例若徒一意減縮勢必馴致坐繫之
患案查臣於去年十一月內

題覆河南按臣李及秀河夫之徵派當更一疏據司
道府廳會議通省夫數已經部覆行臣會同河南
撫臣覆議奉有

俞旨但臣職掌所關河道情形得於目擊夫役規則亦

屬司存任其責而不究事體原委與事體有干典
守而緘默不以入

告皆溺職也除前疏容臣會同河南撫臣賈漢復覆議
具

題另候部覆外所有河道夫役事宜覆議疏內不便
備述謹特專疏陳明伏乞

睿鑒勅部施行

順治十六年正月初八日題二月初六日奉

諭議奏

工部覆前疏

題爲陳明河南夫役事都水清吏司案呈奉本部送
工科抄出總督河道朱之錫題前事等因奉

旨工部議奏欽此欽遵抄出到部送司奉此相應議覆
案呈到部該臣等看得總河臣朱之錫疏稱河南
隆萬年間歲修夫數不知何時更變一例徵銀

本朝仍沿季年之制估計準工鳩夫計夫給食在官
曰募其實在民不得不計畝而派見在河南夫數
屢經諸臣條陳未免以夫多爲疑若徒一意減縮

勢必馴致坐斃之患等因具

題前來應俟總河臣會同河南撫臣覆議李及秀條
議之疏到日再行另議可也奉

旨依議

酌議淮工夫役疏

題爲酌議淮工夫役事竊照江淮河濟謂之四瀆自
明迄今挽河資運會淮注海是以一淮而受兩瀆
之全故桃源之上但一黃河爲害清河之下內則
淮湖宣洩維艱外則黃淮相濟爲暴每遇泛濫其
患尤烈查得前代南河志河防一覽內載淮揚一
帶自平江伯陳瑄經理之後萬曆三年河決崔鎮
而北淮決高堰而東運道梗阻民生昏墊特遣河
臣潘季馴大行葺理請帑六十萬金分委管工自

司道而下共一百八十餘員徵調徭募等夫八萬
名經營數載兩河之流始還故道未幾而十四年
外河范家口天妃壩又以決溢告矣二十一年以
後高堰裏河連歲報決河臣楊一魁又有分黃導
淮減水各閘等工天啓元年高堰並裏外兩河一
時共決十餘處自後漫決時有難以悉述計今距
潘季馴時又將七十餘載如淮湖高堰外河南岸
柳浦灣堤桃清兩岸遙堤崔鎮四減水壩日漸月
累風雨剝蝕廢弛過半卽楊一魁所開分水黃壩

新河亦久淤塞

本朝來河決上流南河賴以無事自順治十三年全黃歸故之後去歲水患已見端倪矣夫疇昔之飛溢甚周猶不免昏墊之害今日之河淮如故乃欲安敝壞之餘其萬萬無幸固不待智者而知也但欲議工作須先計錢糧頃者司農告匱搜括爲難無論請太府之金爲未雨之策未敢輕出而歲額河銀昔時二十有七萬

本朝除荒缺額裁減歸併僅十七萬有奇又於此內

撥出九千餘兩解司充餉加之通惠河道從不取
給河帑者連年撥解動至數萬常例歲修已不勝
捉襟露肘之苦矣臣去歲在淮卽與司道多方商
榷雖不能如前人大舉若高堰塌卸損動石堤不
下數里五險埽工太行老堤三工似皆難緩五險
遙堤宮家營引河尚在勘議查得蘇建堤工在前
明時民修官修屢經更變我

朝初年猶官出料物山陽高郵寶應興化泰州鹽城
泰興七州縣協濟人夫赴工修築河帑所費亦自

無幾自順治九年該省按臣有

題改之議始設募夫歲計工食銀一萬四千四百兩
勘估料物不在此數至于太行老堤民築民修司
道報文確確可據良以前開河帑之設總爲運道
起見山清黃河南岸自草灣以下關民生爲多關
運道爲少

朝廷爲民賦計百姓固亦自爲身家計也

國家愛養民力損上益下恩非不渥然今者帑訕工
繁使盡照估計支給河銀則黃運兩河各數千里

顧此失彼萬一運道梗阻所憂又恐不止淮揚一隅耳爲今之計除五險埽工照舊募夫仍以餘力幫堤高堰石工酌量估計其太行老堤似應仍責山陽莊民若更有應舉工程時迫夫少山陽獨立難支合無暫派下流七州縣民夫分工報竣或照舊自修或酌給食米事關地方力役除臣見在移咨漕撫臣亢得時會議按臣俟入境日移會外但恐光陰如駛轉盼桃花水汛容臣議確具

題一面通行司道起派償做庶

國計民生可恃無虞而運道河帑亦賴以兼濟矣相應具

題伏乞

睿鑒勅部議覆施行

順治十六年正月初八日題二月初五日奉

旨工部議奏

工部覆前疏

題爲酌議准工夫役事都水清吏司案呈奉本部送
工科抄出總督河道朱之錫題前事等因奉

河防疏畧

卷之三

十二

寒香館

旨工部議奏欽此欽遵抄出到部送司奉此相應議覆
案呈到部該臣等看得總河臣朱之錫疏稱淮揚
一帶黃河自十三年全黃歸故之後去歲水患已
見至太行老堤山清黃河南岸自草灣以下關民
生爲多關運道爲少除五險埽工照舊募夫高堰
石工酌量估計外太行老堤似應仍責山陽莊民
若時迫夫少暫派下流七州縣等因具

題前來查五險高堰工原係歲修者似應照舊勘估
修築其太行老堤民修官修屢經更變相應請

勅總河臣會同漕撫按臣從長商酌務期上不悞公下
不累民速行具

題以便另議可也奉

旨依議

查議通惠河工疏

題爲查議通惠河工事據通惠河分司盛治通容道杜漢會詳蒙臣憲牌爲酌定畫一經久之策以重河防事查河防諸書通惠河道浮沙峻水多淺易衝是以前明於所屬州縣設有額夫每歲夏月挑淺春月築堤此外止將本司河銀辦積椿草不聞頻頻估計別請錢糧本部院衙門從未經營原無案卷可稽但查

本朝九年以前額夫濬築之外亦不聞別有估計九

年以後歲甚一歲而動支錢糧始行總河衙門補解今經部議歸併本部院於河銀內通融支發合計通屬目今錢糧已減除昔年之半此項工程反增益先年所無勢有必窮安得不徹底計議以圖經久合行查議爲此牌仰通惠河分司照牌事理卽便會同通密道查前明每歲修濬某年某年止用額夫修築某年某年曾經估計做何工程動銀若干作何支給見今地畝園佔州縣食派額夫給發工食與前是否相同河道原與向時無殊工程

何以頓增數倍自後作何整頓可使費省工堅錢糧可繼糧運不阻可以永遠通行逐一查議妥確會詳報院以憑酌奪母得含糊塞責取咎未便等因到司道蒙此隨即公同會議間復移霸州道併議去後未准會覆今又蒙本部院憲檄爲二催酌定畫一經久之策以重河防事催同前因不便再緩該本司道會查看得前明修濬並無估計動支銀兩皆州縣衛所額設人夫而爲役不足則從便調集軍民夫以繼之今則衛所夫裁軍民夫不聽

調僅州縣額夫而已濬淺猶不足築堤更所難是以前差通惠河始有

題留新河夫銀與葦漁課銀新舊合計八千餘兩總名歲修以資一年濬築未常稱匱自九年以後連年洪水爲害水勢瀰漫動則溢漕一二尺遍地汪洋決堤殺稼漂沒糧艘灾生叵測非特通惠爲然卽霸薊兩道屬邑數百年老堤盡爲衝決估修動四部錢糧數萬計此皆昔之所未見未聞而近年斯疊告者也今通惠一堤之潰動則數百丈尺用

則數千餘金工費盈縮懸殊端啓于此若今歲本
司道蒞任來發水不甚洶湧則堤岸卽無甚衝決
錢糧亦無甚用度撥濟卽無所復煩矣蒙本部院
以經久之圖酌議除見在修築并行廳縣復估者
無容再議嗣後沿河堤岸稍有殘缺可虞者責令
廳印河官不時查勘工小者乘額夫挑濬之隙詳
請調撥及時修補如夫力不敷動支歲修一面報
估一面興築免致盪漾寬闊工完覈實准與報銷
遇伏水泛漲之時仍責印河官撥派額夫晝夜看

守遇急搶救違慢疎誤罪坐廳縣官若口岸走洩
水利有碍漕運者始詳估歲修築塞如係漫水于
漕運無碍止滄溝漢地土者印河官查明申報司
道仍力爲風勸凡有地土于此各令照地派夫併
力幫修庶沿河一帶係民產者人自爲守關漕運
者官各爲衛則公帑可省而河防永固從此工程
歲修可支不煩別請要在

題明嚴飭或亦永遠可行之一策耳司道會議僉同
不知有當于經久之計否擬合呈詳等因到臣該

辦料司道親行查勘工竣報銷推諉誤事照例
題叅每年節省仍貯司庫以備通融支用毋致浮冒
多估另請借解若係地土漫水無關漕運者例不
輕動河銀應聽地方有司竭力風勸照地幫修庶
黃運兩河不致偏枯而臣亦得免于束手矣如果
臣言不謬伏乞

睿鑒勅部議覆嚴飭司道廳印等官一體遵奉施行

順治十六年正月初八日題二月十二日奉

旨工部議奏

工部覆前疏

題爲查議通惠河工事都水清吏司案呈奉本部送
工科抄出總督河道朱之錫題前事等因奉

旨工部議奏欽此欽遵抄出到部送司奉此相應議覆
案呈到部該臣等看得總河臣朱之錫疏稱通惠
河除該司項下額夫錢糧外每歲于河道銀內撥
解六千兩司道責成廳印等官嚴督額夫挑濬修
築印官領銀集夫辦料司道親行查勘工竣報銷
等因具

題前來臣等查通惠河所管河道臣部去年照例
題併總河今臣等議得每歲若撥解銀六千兩但工
程有大小之不同則銀兩有多寡之不一似難允
從奉

旨依議

特議建設柳園疏

題爲特議建設柳園事竊照黃河悍激湍流勢若奔馬禦險塞決非埽罔功每捲一埽用柳動以千百束計千里長堤歲用柳料數且不貲况伏秋河勢陡變埽料在手咄嗟之頃轉危爲安可以免塞決之費卽萬一有決埽料在手旋決旋塞不致正流日淤旁口日豁可以免塞大決之費故必使生植之數常有餘于採辦之數然後可以源源相繼不然而樹藝不廣猝然有急無術點金縱有不竭之

金錢無窮之人力亦不免束手坐困耳觀於瓠子之歌有云河伯許分薪不屬是可見栽柳一事竹頭木屑似乎瑣細而其實乃治河者之第一義也案查前河臣楊方輿暨臣前後題

請責成印官各於河干按汛栽柳分別多寡照例勸懲
臣經部覆奉有

諭旨一年以來報栽無幾除臣再行嚴飭外惟是黃河一帶遼遠偏僻夫役偷安澆灌難遍臣等亦未能
逐履長堤爲虛爲實尚未可知臣竊以爲尤宜責

令黃河經行各州縣印官於瀕河處所各置柳園
數區或取之荒地或就近民田量給官價每園安
置徭堡夫數名布種澆灌既便責成而道廳等亦
可以親詣稽察秋冬驗明行以勸懲之例將見數
年之後遍地成林不但有濟河工而河帑亦可少
節民力亦可少甦矣再照官給柳價每束五分雖
不爲少但一工用柳多至數萬既非市販之物又
重以轉運之難斷非一二人所能辦故屢經部覆
照例令印官責成里甲均採均運奉

旨通行已久今惟嚴行申飭照地均買有柳之家聽其
轉售如有包攬指索扣剋淫折等弊司道等官力
行揭報到臣以憑叅究毋徇毋縱河道民生兼濟
之策無以易此如果臣言可採伏乞

勅部議覆施行

順治十六年正月初八日題二月初三日奉

旨該部議奏

工部覆前疏

題爲特議建設柳園事都水清吏司案呈奉本部送

工科抄出總督河道朱之錫題前事等因奉

旨該部議奏欽此欽遵抄出到部送司奉此相應議覆
案呈到部該臣等看得總河臣朱之錫疏稱黃河
一帶瀕河處所各置柳園數區安置徭堡夫數名
布種澆灌數年之後遍地成林河工有濟河帑亦
可少節民力亦可少甦又稱官給柳價每束五分
但一工多至數萬非一二人所能辦惟嚴行申飭
照地均買有柳之家聽其轉售等因具

題前來查柳稍河工必需今議置園栽種以備急需

此係總河臣職掌相應如議向後應分別多寡照
例勸懲至于用柳多若照地均買恐爲民累前科
臣陳台孫具有夫柳爲河工大弊等事一疏已經
臣部

題覆請

勅總河臣從長確議具

題在案應俟議妥具

奏之日再行另議可也奉

旨依議

嚴剔河工弊端疏

題爲嚴剔河工弊端事臣惟天下之事一事立則一弊生錢穀有錢穀之弊刑名有刑名之弊河工大矣豈能獨無要在有犯必懲而斷不能因去弊之故輒議變法併以誤河如語所云因噎廢食也臣歷任一載詳加體訪約有數端一曰工程有石工有土工有埽工有樁笆工工力不到法式非宜一弊也料物虛浮徒事粉飾一弊也一曰器具有方船活閘刮板戽斗鐵鏟鐵鑊布撈竹筐鐵昏杳葉

杓鐵簸箕五齒鐵扒鐵杵木夯石礮雲梯等項儲
備不預徒手莫施一弊也製作潦草不堪適用一
弊也之二者是皆誤工者也一日夫役有廠夫堡
夫溜夫堤夫泉夫閘夫淺夫舖夫或食條編或食
河銀有募夫食估計河銀尅減工食一弊也奸豪
包佔一弊也賣富僉貧一弊也賄鬻私逃一弊也
一日料物有椿木柳梢甄石草柴蘆葦灰鐵糯米
桐油等項交收捐索一弊也扣減價值一弊也折
糶肥私一弊也盜用官物一弊也之二者是皆誤

工而兼以病民者也然有在官在衙蠹地棍之不
同除屢經禁飭外臣以爲在官者宜責司道府廳
互相覺察據實報臣以憑

題叅不得曰河道不預我事故行推諉如隱諱不報
別有發覺卽查歲終原開賢否各官中間考語如
有大相悖謬者治以徇庇之罪在衙蠹地棍者一
如蠹訪之例責成各屬推官不時開報重者

題叅輕者究治一歲之內全無察報註以劣考廢奸
弊可除而河工克濟是則勞民費財中樽節撫恤

江陽縣志 卷之三 三
之一道也如果臣言不謬伏乞

勅部議覆行臣遵奉施行

順治十六年正月初八日題二月初七日奉

旨這所奏河工弊端着詳議具奏工部知道

工部覆前疏

題爲嚴剔河工弊端事都水清吏司案呈奉本部送
工科抄出總督河道朱之錫題前事等因奉

旨這所奏河工弊端着詳議具奏工部知道欽此欽遵
抄出到部送司奉此相應議覆案呈到部該臣等

議得河工弊端所覆一在清釐一嚴責成今據稱種種弊端誤工而因病民相應在官責司道府廳在衙蠹地棍責各屬推官倘全無察報卽註以下考均應如議仍請

勅下總河臣嚴行司道各印官力行剔釐不得虛應故事如有前弊立行指名

題叅以憑從重議處可也奉

旨是依議行

河防疏畧卷之四

義烏朱之錫梅麓甫著

濟南李之芳鄴園甫定

稽山後學徐沁埜公輯

釐覈贖盡銀兩疏

題爲釐覈贖盡銀兩事竊照額設人夫或司挑濬或
司啟閉或築堤推埽泗水於狂風大雪之時負土
於炎日飛塵之下天下力役之苦未有甚於此者
日給工食銀三分一人之口尚不能糊終年力作
卽間有休暇亦免與追贖以示優恤未爲不可但

人情玩愒勤少怠多使逃曠而坐享廩餼之入則
勤者徒勞怠者自逸反非所以示鼓舞也故每年
有曠盡一項前河臣楊方典題

請隨歲報冊

奏繳於河工內動支開銷奉

旨遵行在案然臣猶竊有慮者黃運兩河延長遼遠萬
一不肖官吏秦越河道或那解別項或侵入私囊
臣問之則曰做工夫問之則曰扣曠筑筑小民無
由控訴當此河帑空虛之日而使有用金錢民損

而官不受其益誠可惜也除臣嚴加體訪得實卽
行指叅外但懲之於後不若嚴之於先臣請自今
爲始責令各管河廳官置立循環每幅首行書某
州縣額夫若干名工食若干中界爲三十格每日
一格內書夫幾名某所做工有無逃曠後行書應
扣曠盡總數工多曠少曠少工多每月造送司道
查明有無實工具文轉報歲終仍將所屬扣過銀
數如歲修例造冊二本到臣臣將原冊一存衙門
稽查一報工部至於天時陰雨非關規避允宜免

扣節勞示勸再照此項原係給過銀內扣出自無
拖欠在民之理州縣印官季終卽行起解河庫如
有歲終不完者非係那借卽是侵欺容臣查明
題叅不惟可以少禪河帑而工程亦不敢虛飾誤事
矣如果臣言不謬伏乞

勅部議覆施行

順治十六年正月初八日題二月初六日奉

旨工部議奏

工部覆前疏

題爲釐覈贖盡銀兩事都水清吏司案呈奉本部送
工科抄出總督河道朱之錫題前事等因奉

旨工部議奏欽此欽遵抄出到部送司奉此相應議覆
案呈到部該臣看得總河臣朱之錫疏稱贖盡一
項錢糧萬一不肖官吏或那解別項或侵入私囊
誠可惜也請自今始置立循環每造送司道歲終
造冊報部扣銀季終卽行起解河庫等因具

題前來查置立循環事屬稽覈侵隱有裨河帑相應
如議可也奉

江陰縣志

卷之四

三

寒香館

旨依議

慎重河工職守疏

題爲慎重河工職守事竊照總河一官所轄黃運兩河不下四千餘里豈能分身一一親理所恃以共濟者司道廳印耳而道印各官又未必能一意辦河則司廳專官尤其要也是必預選而後綢繆可以無誤蓋因材器使用人所亟而獨治河之事非澹泊無以耐風雨之勞非精細無以察防護之理非慈斷兼行無以盡羣夫之力非勇往直前無以應倉猝之機若徒事繩尺以爲無過去之無名留

之有害事後議懲悔已晚矣故非預選不可然人之才畧可信操守難信人事可期意外難期預選固未易也但爲河道起見何敢逆爲過計改轍貽誤惟有白簡從之耳預選之法有二一曰薦用除道印各官不係專司者不敢薦用外伏讀

勅書內開稱若所屬大小官員果能盡心河務卽指實薦舉擢用又查前河臣楊方興於順治十年十一月內

題爲就近請補廳官毋誤黃運兩河事請以

知縣佟養鉅補運河同知定陶縣知縣張鍾英補
黃河同知俱經部覆奉

旨俞允似應題

請照例遵行者也一曰儲材凡有河官懸缺吏部陞補
之日准於臣曾經歲終

題薦過官員內照其本等職級循序陞轉庶始終練
達駕輕就熟而河防有恃似應題

請酌議者也又必諳習而後幹濟可以圖成蓋不學能
知賢哲所難而況治河之事水性之變遷不常修

防之方畧異致器具物料之瑣屑百出夫役錢糧之盈縮多端若姑俟體訪而後施行機變之來呼吸不及事後補救損已多矣故非諳習不可然人之喜遷轉而惡淹滯則畏其留憚勞怨而圖安便則幸其去諳習亦未易也但爲河道起見何敢代爲私計信賞必罰惟有功罪分明耳諳習之法有二一曰久任除道印各官不係專司管河廳官俸滿爲期不便更議外查工部

題覆前河臣楊方輿爲請復河差三年舊例以收實

故事內稱總河臣疏稱河道事宜必須久任諳練以觀其成非三年鮮濟誠從河政起見既經具題前來中河一差相應改復三年更換等因奉有

俞旨欽遵在案查各河差俱以三年爲滿惟通惠一差一年更代但邇來通惠河道地畝經圈錢糧甚費籌畫人夫更難整齊若一年一易毋論初任頭緒不知甫得通曉而報代之期又至功效難集且恐傳舍視之誰肯爲數年經久之圖者工作不堅錢糧益費亦有可慮合無准照各河差例改爲三年

運道河帑不無裨益似應題

請酌議者也一日交代河防職掌刻難乏人員缺代署
不惟利害不切卽驟然經管省解不易難免誤事
除分司例應交代母容更議查前河臣潘季馴河
防書開稱徐州海防二道爲河湖喫緊之區山東
河南二道爲黃河要害之地四道憲職併其所轄
府州縣佐貳管河官如遇陞調去任等項與同管
河分司一例守候交代又稱新舊交代以河上事
體轉相傳告等因今除不係專司各道不便更議

外其河南管河道併各省府州縣管河佐貳官合
無查照往例陞調降用俱令候代離任仍將任內
修防事宜備開清冊傳告新官違者容臣指

叅庶綜理周密便於責成似應題

請酌議者也以上四款要在相濟而行則人材可以不
匱而河道亦可以無虞矣如果臣言不謬伏乞

睿鑒勅部議覆施行

順治十六年正月初八日題二月初四日奉

旨該部議奏

吏部覆前疏

題爲慎重河工職守事文選清吏司案呈奉本部送
吏科抄出工科外抄總督河道朱之錫題前事等
因奉

旨該部議奏欽此欽遵抄部送司相應議覆案呈到部
除河差久任一欵應聽工部查議外該臣等議得
河臣朱之錫疏稱其薦用一欵內稱除道印各官
不係專司者不敢薦用外伏讀

勅書內開所屬大小官員果能盡心河務卽指實薦舉

推用似應題

請照例遵行等語查得臣部于十年十二月內覆河臣
楊方興就近請補廳官毋誤黃運兩河事一疏以
鉅野知縣佟養鉅補運河同知定陶縣知縣張鍾
英補黃河同知奉

照例

題請

勅下臣部議覆請

旨補用儲材一款內稱凡有河官員缺吏部陞補之日
准于臣曾經歲終

題薦過官員內照其本等職級循序陞轉等語查河
官缺員若止于河臣薦舉過官員內陞轉恐俸序
職級未必盡合相應仍照舊行又稱河南管河道
并各省府州縣管河佐貳官合無查照往例陞調
降用俱令候代離任仍將任內修防事宜備開清
冊傳告新官違者指叅等語相應如其所

請以後河南管河道并各省州縣管河佐貳官有陞調

降用者俱令候代離任仍將任內修防事宜造冊交代可也奉

旨依議

工部覆前疏

題爲慎重河工職守事都水清吏司案呈奉本部送工科抄出總督河道朱之錫題前事等因奉

旨該部議奏欽此欽遵抄出到部送司奉此相應議覆案呈到部該臣等看得總河臣朱之錫疏稱通惠河道地畝經圈錢糧甚費若一年一易誰肯爲經

久之圖合無准照各河差例改爲三年等因具

題前來查各處河差俱係三年其通惠河于十二年
六月內因滿漢官同差惟滿漢官奉公更調不便
久任故

題照關差一年之例再查先差分司已經報滿似應
更換嗣後新差官員亦應照舊例三年更替可也
奉

旨依議

申明河官專責疏

題爲申明河官專責事竊惟天下之事刑名錢穀皆可以理斷臆決文移辦治獨河道一事非足到眼到則形勢之委曲工程之堅瑕鮮不有錯施而誤事者查先臣潘季馴修築淮工調委附近司道八員分管且申飭各官總有應理公務止許工上幹辦此可見經理河事斷非身親不可而況平分內職業又何暇舍已而耘人也况運河當旱涸之際黃流在暴漲之時一二河官遠者所轄不下千里

州縣佐貳汎內河道亦不下百里刻刻往來尚不免顧此失彼若更有他營豈能無誤案查前河臣楊方輿題

請申飭河官不許別委已經奉有

俞旨但事久易弛上司差遣必係急事河官自恐取罪勢又不敢強辭甚至有寧誤本職而黽勉從事者河漕關係甚重誠不得不逆爲過計仰請

天語特賜申飭若河官奉委卽自行具報到臣庶萬一因之貽誤責有所歸河官不報卽坐以營求差委

之罪又照按臣考察事關大典豈容苟免但恐值河道多故時郡城相距河干道路必遠若河官不在竟以修防付之老人夫役臨流頓足何濟於事合無容令該轄同事道府代爲申明俟河事稍定准赴補考庶責成肅而河防得以有恃矣如果臣言不謬伏乞

睿鑒勅部議覆施行

順治十六年正月初八日題二月初五日奉

旨該部議奏

工部覆前疏

題爲申明河官耑責事都水清吏司案呈奉本部送
工科抄出總督河道朱之錫題前事等因奉

旨該部議奏欽此欽遵抄出到部送司奉此相應議覆
案呈到部該臣等看得總河臣朱之錫疏稱一二
河官遠者所轄不下千里州縣佐貳亦不下百里
刻刻往來不免顧此失彼若有他營豈能無誤若
河官奉委卽行具報到臣不報坐以營求差委之
罪又稱按臣考察恐值河道多故容道府代爲申

明准赴補考等因條議前來查河官專司河道不應再委他事嗣後河官奉委卽行具報總河衙門與夫考察離汎及代申補考事宜均應如議可也
奉

旨依議

申明激勸 大典疏

題爲申明激勸

大典事順治十五年四月初七日准吏部咨爲特請歲行舉劾之例以勵官方以重河道事文選清吏司案呈奉本部送吏科抄出該本部覆河道朱總督題前事等因順治十五年二月十四日奉

旨該部議奏欽此欽遵抄出到部送司相應議覆案呈到部該臣等議得總河朱之錫疏稱原奉

旨督撫任滿一年舉劾文武官一次二年二次三年三

次其中丁憂養病及降處休致的不許舉劾今十四年河工告竣前河臣楊方興以致仕臣以新任俱未行舉劾請以舊工報竣之後將該年勤勞玩誤各官分別具

題以昭勸戒等語查河臣專司河道原與直省督撫不同相應

勅下該督於每年歲修告竣卽行舉劾可也理合具覆
恭候

命下臣部遵奉施行等因順治十五年三月十九日奉

旨依議行欽此欽遵抄部送司相應行咨案呈到部務
咨到臣正在欽遵行查十四年河工勤怠各官繼
因督撫年終舉劾奉

旨停止未經申

請不敢冒昧具

題臣竊惟吏治之事皆可安坐而理獨行河一官奔
走泥塗不暇停踵憂涸則倉皇于炎日之下防漲
則踟躕于風雨之中較之別官最爲勞苦蓋非此
不足以言稱職也況與民休息則河工必墮先事

綢繆則民怨易生怠玩有司博姑息之虛名文偷
安之積習甚且反詬河官爲厲民爲多事而肯於
任事者亦且灰心沮氣徼倖苟安矣又臣河道所
轄司道文武各官如築堤估埽挑濬河泉節宣開
座鳩夫辦料僱運防河等事經理勞績皆別衙門
所不盡預聞使非有以鼓舞而策勵之則勤者徒
勤而怠者亦終安於怠事後議懲誤亦不小查吏
部覆臣原疏內開河臣專司河道原與直省督撫
不同歲修告竣卽行舉劾奉有

會旨今十五年河工又已報竣竊恐賞罰久廢後効難期合無仍遵前

旨容臣照河道衙門舊例于歲終之後通將河屬各官確查賢否勤怠分別舉刺以示勸懲庶人心兢奮而黃運兩河羣力畢舉矣再照州縣管河佐貳等官官職雖微關係頗巨勞苦尤深誤事獨重其罰而盡職不酬其勞亦非所以示均平也似應量擇其尤另疏薦錄寧嚴勿濫如有貪濫不職一體

題叅是亦鞭策人材之一端也如果臣言可採伏乞

勅部議覆行臣遵奉施行

順治十六年正月初八日題二月初五日奉

旨該部議奏

工部覆前疏

題爲申明激勸

大典事都水清吏司案呈奉本部送工科抄出總督河道朱之錫題前事等因奉

旨該部議奏欽此欽遵抄出到部送司奉此相應議覆案呈到部該臣等看得總河臣朱之錫疏稱查吏

部覆臣原疏內開河臣專司河道原與直省督撫
不同歲修告竣卽行舉劾繼因督撫年終舉劾奉
旨停止今十五年河工又已報竣竊恐賞罰久廢後劾
難期合無仍照河道衙門舊例于歲終將所屬各
官確查賢否勤怠分別舉刺以示勸懲又稱管河
佐貳等官官職雖微關係頗巨似應量擇其尤另
疏薦錄等因具

題前來查河道雖與臣部職掌相關而舉劾河官事
隸吏部相應請

勅吏部議覆可也奉

旨依議

吏部覆前疏

題爲申明激勸

大典事文選考功清吏司案呈奉本部送吏科抄出工
科外抄總督河道朱之錫題前事等因奉

旨該部議奏欽此欽遵抄部送司相應議覆案呈到部
該臣等議得總河臣朱之錫疏稱前吏部覆臣特
請歲行舉劾之例一疏內

勅下該督每年歲修告竣卽行舉劾奉有

依議行之

旨繼因督撫年終舉劾奉

旨停止不敢冒昧具

題今十五年河工又已報竣合無仍遵前

旨容臣照例分別舉劾以示勸懲再照管河佐貳等官

亦應量擇其尤另疏薦錄至貪婪不職一體

題叅等語查十五年九月臣部覆漕督尤得時

請明漕竣舉劾之例一疏內議總漕衙門似難與督撫

事例同論相應仍舊舉劾奉有

依議之旨查河臣專司河道原就本年濬築之勤惰別其臧否若概停舉劾則管河之官無以勸懲亦不便與督撫事例同論相應如其所請照舊舉行至管河佐貳等官官職雖微其河工之責成頗巨如有勤勞盡職者應行薦舉寧嚴毋濫其貪婪不職者聽河臣一體

題叅可也奉

依議

酌議撥補夫食疏

題爲酌議撥補夫食事案查前河臣楊方興於順治十四年六月內准戶部移咨內開爲察議蠲荒錢糧事山東清吏司案呈奉本部送戶科抄出總河部院楊方興題前事等因順治十四年四月十三日題本月二十五日奉

上直該部察議具奏欽此欽遵抄出到部送司奉此相應議覆案呈到部該臣等看得河夫驛站官俸役食等項臣部於十二年題明訂正賦役疏內存留各

欵除荒缺額查有續報開荒地土新增人丁銀兩
先補存留後補起運奉有

俞旨欽遵在案又經題覆山東撫臣耿燾題爲察議獨
荒疏內除驛站已將續報丁地銀內每年動補十
一萬兩其河夫官俸等項未分某項缺額銀若干
復經請

勅逐欵分晰某項應補銀若干造冊報部以便酌補去
後今總河臣疏開除官俸役食等項聽撫臣咨部
外其河夫工食銀除荒缺額銀四萬八千二百八

十四兩零內訂正賦役全書將裁剩銀先補過二萬二千三百三十八兩零外尚缺額銀二萬五千九百四十六兩零今將續報新增丁地銀內抵補一萬五千七百四十六兩零又將續報招墾屯地銀內抵補一萬一百九十九兩零題

請前來既經總河臣查明細數分晰抵補似應准其所請仍將每年終給散過河夫工食數目造冊報部覈銷可也相應具覆恭候

命下臣部轉行遵奉施行等因順治十四年五月十四

日題本月十五日奉

旨依議欽此欽遵抄出到部等因移咨前河臣備經遵
行在案該臣看得河道修濬關係糧運山東濟南
兗州東昌三府設有泉閘淺溜等夫例于條鞭內
日給工食銀三分零因各州縣除荒數多夫食不
足前河臣楊方興於三年五月內具疏

請復原額夫食奉

旨河夫工食照原額徵給後因十二十三兩年一槩除

荒復經題

請部覆除將裁剩銀補過外尚有缺額銀兩將續報新增丁地續報招墾屯地兩項銀內抵補既經河臣查明應准所請奉有

俞旨但查布政司原撥各項多係寫遠隔府銀兩各府緩急不關易致逋欠且距各夫本境或千里或數百里窮夫勢不能裹糧赴領必須解交司庫缺額州縣領出給夫衙門隔絕上下易壅一經輾轉而消耗之弊難保盡無又或官胥已經領出羣夫無自而知枵腹從事不免逃散貽誤糧運所關非小

今山東地畝奉

旨清丈賦役經制似應畫一以垂久遠臣愚竊謂凡本
州縣夫食仍聽本州縣增出地畝補給如猶不足
額卽于本府內鄰近州縣撥補解府轉發較之藩
司支領差易其原撥隔府銀兩任其解司充抵別
項在官旣自無損項款正復不淆而貧夫沾惠糧
運亦藉以飛輓矣如果臣言不謬伏乞

勅部議覆施行

順治十六年正月初八日題二月初十日奉

請該部議奏

戶部覆前疏

題爲酌議撥補夫食事山東清吏司案呈奉本部送
戶科抄出總督河道朱之錫題前事等因奉

旨該部議奏欽此欽遵抄出到部送司奉此相應議覆
案呈到部該臣等查得濟兗東等府屬河夫工食
前因除荒缺額該總河楊方興于十四年五月內
題

請臣部隨將新增丁地并招懇屯地二項銀兩准其照

數撥補奉有

俞旨欽遵在案今河臣朱之錫疏稱本州縣夫食仍聽
本州縣增出地畝內銀補給如猶不足卽于本府
屬鄰近州縣撥補解府轉發其原撥隔府銀兩任
其解司充抵別項等因前來查得各州縣起解各
部項下錢糧原有定額不便紛更且賦役久經訂
正仍應照舊行可也奉

旨依議

河道關係甚重疏

題爲河道關係甚重地方責任維均仰祈

天語特飭以圖共濟以保無虞事竊照黃運兩河接連
數省撫臣身任地方境內河道固亦職守所在惟
是全河須審其源流而各省或限于封畛故設總
河一官以統其成日久相沿遂失舊治撫臣初避
越俎之迹浸成秦越之分長河數千里總河以耿
然一身控制其間鞭長不及且調集夫料事體參
差未免貽誤查前明南河志部覆余汝爲條陳河

道一疏內開總河固爲治河之臣巡撫亦兼河道之責事體旣各相關利害似難獨任據題將河南山東鳳陽巡撫各地方各分信地共任其責有功並錄有罪並議誠有見治河非一手一足之力故爲此議相應依擬等因蓋專任分理統係王臣孤掌之難鳴誠不若衆擎之易舉也臣猥以疎庸濫竽河事日夕惴惴惟恐隕越以玷

任使綢繆荒度不敢自後而獨不能不鯁鯁過計者河防利害爭于呼吸如去歲十月內南河泛濫自淮

至濟相距八百餘里司道臨急而具報臣聞報而
南馳程途來往已踰旬日猶幸漕撫臣亢得時就
近任事徵夫趨料搶護支持臣及抵淮次第補葺
又彼時霜降已過故別汎稍平臣得以專督淮上
若伏秋漲發長河一帶急則俱急臣分身無策萬
一夫料急需司道各官拘泥文移耽延害事爲憂
非小臣於前月北閱運河回濟卽遵

旨閱視淮工裏外兩河緣去冬重創之後堤岸受傷危
如壘卵何期淮屬自二月來淫雨連旬工作難措

未及桃花汛候已告盈溢時入伏秋其險必且甚
于去冬憂心如灼除一面嚴檄司道等官上緊督
修並移漕撫臣協力催督共濟修防外但黃河各
工如江南之桃鮑邳徐山東之曹單河南之開歸
兩府在在戒心臣勢難株守一工顧此失彼仰祈
天語特勅各該地方撫臣查照往例平時共事綢繆臨
急從宜搶救臣任全河撫臣任境內不惟節節周
防長河有事而釐察吏弊體恤民隱亦可以互勸
不逮所裨河政非淺鮮也伏乞

睿鑒勅部議覆施行

順治十六年三月初八日題本月二十二日奉

旨該部議奏